



Die Rietstok

Die 11^e Nuusbrief van Rietvalleistreek van SAWA

Maart 2009

Uit die Voorsitter se pen

Eishh – met ys ja!! Dit is wat ons hierdie jaar nodig sal hê om teen dié spoed te kan volhou. Ons het al drie kampe agter die rug, plus 'n oop NUB-kamp. Dan het ons die eerste kwartaal oorleef, en die April vakansie lê voor. Verskeie Rietvalleiers gaan in April met hul jaarlikse verlof. Ek hoop dat almal hierdie welverdiende vakansie sal geniet – en kom veilig terug!

Net kortlik 'n paar woorde oor hierdie kwartaal se kampe. Januarie het ons op kort kennisgewing 'n nuwe kamp besoek, nl Tambotie Vreugde en volgens die terugvoer, was dit 'n wenner. Mooi en skoon badkamers, aangename bestuurders wat persoonlik betrokke was, en ook nie duur wat tolhekke betref nie. Uiteindelik, weens die koel swembaddens, kon die hitte sonder moeite verduur word.

Die kamp in Februarie by Monateng, saam met Wapadrand, was baie aangenaam. Dalk was die getalle van beide streke nie

kenmerkend van die normale syfers nie, aangesien albei streke net 16 woonwaens, dws 32 in totaal, gekamp het. Aan geesdrif onder die deelnemers het daar niks geskort nie. Die saambraai Vrydagaand en die waterkaskenades Saterdag, was goed bygewoon. Tydens die Super 14 rugbyprogram, sal ons sekerlik die rugbykykers tegemoet moet kom, wat die boekevat en vyf uur wedstryde aan betref. Ek sal graag wil hoor wat sê die Rietvalleiers rondom hierdie saak. Moet ons boekevat 16:30 hou, of dalk liewer 19:00 in plaas van 18:00? Kom gesels asseblief met die bestuurslede hieroor.

April bring die Presidente en daarmee ook die nuwe opgegradeerde kampterrein by Potchdam. Miskien nie so nuut nie, want die Presidente was al voorheen hier gehou en wel ook met die eerste Sawa Fietsfees. Dit is dan ook gepas dat die eerste kaskarwedren ook by Potchdam gehou gaan word. Wapadrand het ongelukkig onttrek van hul deelname aan die kaskarwedren en is Rietvallei saam met Willem Nordeje en streek Jakaranda verantwoordelik vir die aanbied van die wedren. Dus moet ek 'n beroep doen op elkeen wat sy weg sal oopsien om deel te neem aan die verrigtinge om julself beskikbaar te stel om Saterdag, 11 April te help om van die eerste kaskarwedren 'n sukses te maak. Indien jy nie kan kamp nie, kan jy ook net vir die dag deurry of dalk saamry reëlings tref om kostes te beperk. Weereens, as julle enigsins kan help, laat weet asseblief vir Diana Fourie. Aangesien ekself ook nie beskikbaar sal wees nie, het Diana goedgunstig aangebied om saam met Magriet vd Berg die koördinering te behartig.

Julle sien nou hoe vinnig hierdie jaar homself ontplooï het. Ek vertrou dat die jaar wat voorlê vir elkeen van ons 'n uitdaging sal bied.

Rietvallei Groete,

Klaus

Rietvallei Bestuur 08/09

Voorsitter

Klaus Lübbert
Posbus 904, Silverton, 0127
083-6883636
klubbert@lantic.net

Onder-voorsitter

Tjaart Klaasen
082-7856895
tjaartjk@absa.co.za

Penningmeester

Lizette Schulte
084 585 2088
lizetts@absa.co.za

Sekretaresse

Trix van den Berg
082-9273267
bvdberg@plotnet.net

Redaksie

Elsabé Grobler
083 799 1645
groblerje@absamail.co.za

Addisionele lid

Reinier van den Berg
082 773 8922
reinier.vandenberga@webafrica.org.za

Seniorburger

Verteenwoordiger

Fritz Crous
082 929 9945
elize@lexmail.co.za

Website:

www.sawa.org.za

Inhoudsopgawe

- Uit die Voorsitter se pen
- Pitkos
- Kamp Nuus
 - Tamboti Vreugde – 16 tot 18 Januarie
 - Monateng – 20 tot 22 Februarie
 - Eastco – 20 tot 22 Maart
- Lief en Leed
- Toekennings
- Seniorburger Aktiwitteite
- Nuus vanaf Rietvallei Bestuur
- Knuppel Dik
- 2009 Kampprogram
- Lekker Lag
- Kleilat Hoekie
- Kalender – belangrike datums vir April tot Junie 2009

Red

Die eerste 3 maande van 2009 lê op sy rug en dit is asof hierdie sneltrein geen remme ken nie. Ons kinders se dae is gevul met akademie en sport, pa is tot laat besig sodat hy asb tog net môre met 'n skoon lessenaar kan begin. Ma ry haar dood agter die kroos aan en probeer die gesin se dagboek so skeduleer dat hulle met aandete almal darem om een tafel sit - dis 'n dolle gejaag. Ek wil die volgende by jou laat – herkou hieraan en dink weer vir 'n slag waaroor die lewe eintlik gaan.

Die lewe is kort – leef dit

Liefde is mooi – voel dit

Kwaad wees is lelik – los dit

Probleme is tydelik – aanvaar dit

Herinneringe is vir altyd – bewaar dit

Jy & jou gesin is spesiaal – ONTHOU DIT

Pitkos

‘n Christen se Gebed:

Ons aanbid U in hierdie tyd as Christus die Oorwinnaar.

U het op Golgota die dood oorwin.

U het die mag van die Satan gebreek.

Die Here het waarlik opgestaan! Die graf is leeg!

Laat die hemel sy roem verkondig!

Dankie, Jesus Triomfator, dat U tot die dood toe gehoorsaam was
en dat God U tot die hoogste eer verhef het;

dat u aan die regterhand van God sit en vir my intree.

Dankie dat U my saamvoer op u triomftog deur tyd en ewigheid.

Ek weet verseker dat, omdat U uit die dood opgestaan het,
ek ook uit die dood van die sonde kan opstaan
tot ‘n nuwe lewe van oorwinning.

Here Jesus, omdat U die opstanding en die lewe is,
sal ek kan ingaan in die ewige tuiste wat U gaan berei het.

Laat my nooit u lewende teenwoordigheid vergeet nie;
verseker my opnuut dat daar nikks en niemand
is wat my van u liefde kan skei nie.

Vergewe my, genadige Here Jesus, as ek soms nog lewe asof U
dood is.

Laat my elke dag van hierdie tydperk en al die dae van my lewe
in die heerlike troos lewe van U belofte;

“En onthou, Ek is by julle al die dae!”

In die Naam van my opgestane en verheerlikte Heiland

Amen.

Kampnuus



TAMBOTI VREUGDE (TJAART KLAASEN)



Tamboti Vreugde is 'n nuwe oord, 'n familie plaas onder bestuur van Eddie en Paul. Die pragtige grasperke en koeltebome was nie net aanloklik vir die wild nie, maar ook vir die lede.

Die bestuur het ons streek met besondere gasvryheid ontvang en hul het ons verrigtinge met groot ywer bygewoon.

Die naweek is afgeskop met worsbroodjies en sous, waarna die boekvat deur al die lede bygewoon is.

Saterdagoggend het die kinders vroegoggend die swembadwater trotseer en hulself die heeldag besig gehou. Die ouergardes het hulself in die 2de swembad huisgemaak en lekker verbrand.

'n Verrassings-ooievaarstee is gehou vir Trix van den Berg (sy en pa Jaco het intussen 'n dogtertjie ryker geword), bygewoon deur die dames in die streek asook vriendinne en familie wat vanaf Pretoria deurgery het. 'n Eerste vir



Rietvallei wat sommer 'n instelling behoort te word.

Saterdagaand het lede heerlik boekevat gehou en ook op 2 wildsrritte die plaas verken, terwyl die ander die vure aangestek het.

Sondagoggend is die DisCo (Dit is sonder Christus onmoontlik) Sondagskool deur die kinders bygewoon, waarna ons na 'n



treffende boodskap, gebring deur Jacques Fourie, geluister het.

Die gesamentlike "Brunch" was weereens 'n sukses, en na die afsluiting was daar sommer nog lekker gekuier onder die bome en die dag is vir so lank as moontlik uitgerek - lede het maar traag opgepak!

Ons sien uit daarna om die oord weer te besoek.

Kontak besonderhede:

Tamboti Vreugde Gasteplaas

CELL 0824584503

TEL : 012 327 3755/6

FAX : 012 3273755

transvaalbagco@telkomsa.net

MONATENG (KLAUS LUBBERT)

Hierdie naweek is gesamentlik gereël deur Wapadrand en Rietvallei sodat ou vriende weer blymekaar kon kom, kon sien hoeveel plooie ons bygekry het en te besin oor al die skete en pyne. Maar die naweek was so besig dat ons nie veel tyd gehad het om oor die negatiewe uit te wy nie.



Vroeg Vrydagoggend het Sawanante al aangekom, party net om hul woonwaens te bring en ander om te rus. Dis hulle wat kan organiseer en lekker rus. Ons ander "loose" behoorlik uit.

Vrydagaand was vir die Rietvalleiers iets anders. Ons is mos gewoond om kamp op te slaan en dan rustig te raak met die wete dat die kampkommandante sal sorg vir die spyse. Hierdie keer moes ons ons eie vleis braai, maar kry toe pap en sous verniet. Dit het nogal vorentoe gesmaak. Daar is nog lank na boekvat en registrasie om die vure gekuier voordat Klaas Vakie ons verlos het van die lawaai van kuiery.



Saterdag was bedoel vir laat slaap. Niemand was lus om vroeg op te staan nie, maar die heerlike oggend het ons na buite gelok. Vir 'n bietjie afwisseling het Wapadrand ons lekker laat ontspan met waterkaskenades en toutrek.

Dit was groot pret. 'n Pluimpie vir Francois Swart, wat die speletjies georganiseer het.

Die Super 14 rugby was ook duidelik sigbaar en hoorbaar, want baie kampeerders bring deesdae hul televisies saam sodat hulle darem op hoogte kan bly van die rugbytellings en die sepies.

Na boekvat het Willem ons meer ingelig oor die kaskarwedren wat by die Presidente saamtrek gaan plaasvind. Dit is duidelik dat daar hoeë verwagtinge aan die kaskarwedren gestel word.

Na die inligtingsessie het die vure al hoog gebrand ter voorbereiding van die buurmanbraai. Selfs die donderweer en blitse het ons nie weerhou van 'n vleisie oor die kole nie, maar dit was 'n "so-verby-reën" en het die Wapadranders en Rietvalleiers tot laat gekuier.

Sondagoggend het Jacques ons weer op sy besondere manier verryk met 'n boodskap uit die Woord oor hoe ons behoort te lewe. Ek is seker dit het elkeen van ons weer 'n bietjie laat nadink.



Tydens die afsluiting het ons die gebruiklike koek en tee geniet. Die versnaperinge was voorwaar 'n treffer – soos net ons Rietvalleiers kan!

'n Paar bittereinders het die naweek tot die uiterste gerek, weer 'n vuurtjie aangestek en die laaste braaipakkies uit die yskas gehaal om te braai en nog gekuier.

'n Hele paar het met rooi lywe en gesigte rondgeloop. (Die rooi gesigte was nie van skaamte nie, hoor). Ja, dit was 'n heerlike warrrmmmm naweek.



**EASTCO
(MARNETTE
V
RENSBURG)**

Toe ek agterna dink aan dié naweek, het dit my herinner aan hoërskoolatletiek. Ons dirigente het dikwels vir ons 'n "liedjie"/kreet/geraas

laat doen waar hulle sulke teenstellende goed skree, waarop ons dan gereageer het met "Jaaaaa" of "oooohhhh":

Kampnaweek – jaaaaa!!!
 Reen – oooohhhh!!!
 Mooi area – jaaaaaa!!!
 Slegter stukkie modderpad – oooohhhh!!!
 Pragtige kampterrein – jaaaaa!!!
 Dubbele bespreking – oooohhhh!!!
 Lekker worsrolle – jaaaaa!!!
 Koud Vrydagaand – oooohhhh!!!
 Lekker weer verder – jaaaaa!!!
 Erediens in die son – oooohhhh!!!
 Bambi bokkies kom kuier – jaaaaa!!!
 Hulle keer in die nag die asdromme om – oooohhhh!!!
 'n Klein ablusieblokkie net vir ons – jaaaaa!!!
 Die arme mans stort koud – oooohhhh !!!

Ten spyte van die feit dat die terrein vir die meeste van ons nogal ver was, was ons opkoms baie goed. 26 Waens waarvan 4 besoekers. Miskien het die beplande toer na Namibië van sekere lede en 'n beplande toer na Botswana van sekere ander lede 'n invloed gehad.

'n Klompie lede het baie pret gehad met die 'quads'. Hulle het met heelwat stof en groot glimlagte teruggekom van dié ekskursie.

Eastco is regtig 'n pragtige oord en die skadunet-afdakke en sementblaaie werk baie goed. (Die kragpunte aan die pale is ook 'n baie goeie plan – as jy hulle raaksien voor jy begin dink dis 'n kraglose kamp). Al voel dit vir ons ver (behalwe vir Centurion- en Krugersdorp-lede), is dit maar dieselfde afstand as Warmbad toe, en 'n mens het nie tolhekke nie – altyd 'n pluspunt.

Lief & Leed

- Baie welkom aan klein Deidre van den Berg wat Woensdag 28 Januarie 2009 om 13:25 haar opwagting gemaak het. Met 'n gesonde 3,6kg lyk sy nes haar sussie Marcelle. Sy woon ook reeds gereeld Rietvallei se kampe by.
- 
- Nog goeie nuus vir die vd Bergs is dat **Reinier en Lucille** hul 2de kind in Augustus verwag. Baie geluk en geniet die rustigheid.....
 - **Frits & Tanya Kroon** het nog die een oomblik as besoekers met hul nuwe wa kom kamp en die volgende oomblik het die heerlike samesyn asook'n bietjie druk van Jaco en Trix gesorg dat hulle op ons ledelyst beland het. Baie welkom aan die Kroons. Ons sien julle is sommer reeds tuis – ons hou daarvan!
 - Baie welkom ook aan **Willem & Martie Momberg** wat vanaf Kiepersol wat oorskui na Rietvallei. Julle kon nie 'n beter skuif gemaak het as Rietvallei nie!

- Met kleine **Daniel Gazendam** se eerste kamp het pa Albert gesorg dat die outjie met 'n nuwe wa kom kamp (dis altans die verskoning wat pa Albert gebruik om 'n nuwe woonwa te kon regverdig). Baie welkom aan klein Daniel met sy 1e kamp – ons het lank gewag & baie uitgesien om jou deel van Sawa te kon maak.
- Dit is met groot hartseer dat ons moes afskeid neem van een van ons lede, **Kenny Mulder**. Ons diepste meegevoel gaan na Susan en die kinders.
- Dit gaan op en af met **Tannie Joan Reitz**. Voorbidding word asb versoek.
- **Margriet vd Berg** het baie goed aangesterk na 'n galblaas operasie.
- Dit gaan beter met **Tjaart Klaasen** se moeder. Dit was 'n harde tydjie waardeer die Klaasen gesin is en ons vra dat mede Sawanante in hul gebede aan hulle as familie sal dink.

Toekennings

Bywoningsplaatjies is deur die volgende lede ontvang:

Wie	Streek	Algemeen
Tjaart & Marietjie Klaasen	50	
Jacques & Mariana Marneweck	20	
Henk & Glen Kahts		25

Seniorburger Aktiwiteite

"OUD MAAR NOG NIE KOUD....." (FRITZ CROUS)

Stil stil is die senior lede altyd besig om rond te beweeg en te kamp.

In November 2008 het Neels en Rina 'n nie amptelike toer na die Kersiefees in Ficksburg gereël.

Twintig woonwaens het by Frankfort bymekaar gekom en vandaar oor Bethlehem, Ficksburg, Marquard en Cloolan na Ladybrand vertrek. Op Ladybrand het ons by Little Rock (voorheen Leliehoek) tussen die berge en reuse dennebome kamp opgeslaan vir die volgende week.

Onder die groep was drie Rietvalleiers, naamlik: Neels & Rina, Philip & Sanet en Fritz & Etresia. Die res van die groep het bestaan uit ou bekende toer vriende soos Frikkie & Joy Benecke, Neels & Bettie Malan, Joey & Koekie Muller, Mel & Lettie Ueckermann, Danie & Margeret Small, Corrie & Hendrien Clase, Corneels & Olive vd Merwe en Dries & Kate Niemandt, asook 'n groep nuwe vriende. Almal gesoute SAWA toerlede.

Die week het bestaan uit 'n onvergeetlike besoek aan die Katsedam in Leshoto, rotstekeninge in die Ladybrand omgewing, Kersiefees in Ficksburg en ure van kuier in die



mooiste natuurskoon van die Oos Vrystaat.

Die nuwejaar het vreedsaam begin, maar onderlangs is daar ernstige beplanning van 'n 42 dae toer na die Weskus wat sal insluit byna al die Nasionale Parke suid van die Oranje, Namakwaland se blomme en selfs Orania.

Neels & Rina asook Sieg & Annetjie het besluit om in April saam met van die jonger lede Namibie te besoek terwyl Ben & Alta saam met Philip & Sanet alreeds vertrek het op 'n soortgelyke toer.

Seniors word op die Waterberg toer deur Wim & Margriet asook Steve & Lulu verteenwoordig.

Dan is daar Willem & Martie (nuwe Rietvalleiers) wat nie kan wag nie en sommer hulle eie toer maak na die Boland

Wat 'n voorreg om 'n SAWA seniorlid te wees.



Sjoe oom Fritz ons
werkersklas begeer om die
Seniortoere te kan
meemaak. Eendag.....
Geniet elke oomblik van jul
groot voorreg. Red.

Nuus vanaf Rietvallei Bestuur

- 'n Versoek word gerig dat Rietvalleiers wat die kamp gedurende die langnaweek van 12 tot 16 Junie te Koro Koro wil meemaak asb hul name deurgee aan Trix vd Berg. 'n Deposito van R100 kan in die Rietvallei rekening inbetaal word aangesien Koro Koro 'n deposito vereis.
Sawa Rietvallei,

Absa rekening nr: 4063646613,

Takkode : 632005,

Verwysing; Jou naam / Koro Koro

- 'n Spesiale feestafeldoek (1.80. x 1.50m) is ontwerp om Sawa se 40ste bestaansjaar te herdenk. Dit is roomkleurig met die feesembleem in die middel in kleur. Die streekembleme word in swart rondom gedruk. Die feestafeldoek kan teen R150 aangekoop word. Inbetalings kan in die Nasionale Sawa rekening gemaak word. Kontakbesonderhede Sawa kantoor 011 918 0699:
- Absa Boksburg
 Rek nr: 230 155 771
 Tak kode: 632 005
 As verwysing: Naam / Lid nr / Tafeldoek
- Ons wil aan *Jacques & Diana* baie sterkte toewens met hul 1e toer as toerleiers wat voorlê. Geniet elke oomblik en ons wag vir fotos en toernuus.

Knuppel Dik

Gooi Mielies! - ontbythappie

Hierdie resep is basies dieselfde as vir die maak van pampoenkoekies, maar die verskil is dat pampoenkoekies nie so lekker smaak soos mieliekoekies vir ontbyt nie (veral nie saam met lekker bros spek en heuning nie).

Jy het nodig (vir 6 porsies)

- 2 eiers, die geel en die wit geskei
- 1 x 415g blik geroomde suikermielies
- $\frac{3}{4}$ koppie koekmeel
- $\frac{1}{2}$ teelepel bakpoeier
- $\frac{1}{4}$ teelepel sout
- olie vir diepbraai



Dan maak jy so:

Opgeklits: klits die eierwitte tot styf. Meng die res van die bestanddele (behalwe die olie) in 'n ander bak en vou die styfgeklopte eierwitte by die mieliemengsel.

Lepel vir lepel: verhit die olie in 'n pan en sodra dit warm is, skep eetlepels vol van die mengsel in die olie. Braai aan die een kant tot die koekie stewig is en draai dan met 'n eierspaan om sodat die ander kant ook kan bruin braai.

Warm of koud: nadat jy die koekies klaar gebraai het, moet jy dit op 'n papierhanddoek uitskep sodat die olie kan dreineer. Bedien die koekies warm (jy kan dit ook koud bedien vir padkos).

Wenk: Strooi 'n bietjie Aromat oor indien jy 'n Aromatversamelaar is.



Kampprogram 2009

MAAND	DATUM	VENUE	KAMPKOMMANDANTE
April	9 – 13	Potchefstroom	Presidente
April/Mei	24 – 3	Rietvallei Feestoer	Jacques & Diana Fourie
Mei	22 – 24	Klein Paradys (Brits)	Frits & Etresia Crous en Rudie & Mia Crous
Junie	12 – 16	Koro-Koro	Wim & Margriet vd Berg & Jacques & Diana Fourie
Julie	17 – 19	Dube	Tjaart & Marietjie Klaasen
Augustus	7 – 10	Bush Baby (AJV)	Bestuur
September	11 – 13	Sal bekend gemaak word	Gebiedskamp
Oktober	9 – 11	Buffelspoort	Kongres
Oktober	23 – 25	Mutango	Benodig kamppkommandante
November	20 – 22	Drie Berge	Bestuur

Let asb daarop dat Streekskampe in blou gemerk is.



Lekker Lag



Jannie se ma loer deur die venster.
Jannie en sy kat is besig om Kerk-Kerk te speel.
Hy sit daar stil en preek vir die kat.
Glimlaggend draai sy om en gaan aan met haar werk.

Die volgende wat sy hoor is 'n vreeslike gerumoer, dit muaaw en blaas - dit is 'n vreeslike gedoente!!

Sy hardloop terug en sien Jannie is besig om die kat te DOOP in 'n bad water.


"STOP DIT!" skree sy vir Jannie "die kat is bang vir die water".

Rustig kyk Jannie op en antwoord sy ma:

"Hy moes daaraan gedink het voordat hy by my Kerk aangesluit het."



PICTURE OF A PERFECT MAN



Did you really think there was one????

Kleilat Hoekie

'n Hondjie te koop

Die eienaar van 'n troeteldierwinkel sit op 'n dag 'n advertensie in sy winkel se venster: *Klein hondjies te koop.*

Sulke advertensies het nogal die vermoë om klein kindertjies soos magnete aan te trek. Kort daarna kom daar dan ook 'n klein seuntjie in die winkel in en vra: "Vir hoeveel gaan julle hierdie hondjies verkoop?"

Die eienaar antwoord hom: "Enigiets van R30 tot R60."

Die klein seuntjie vroetel in sy sakkie rond en sê: "Ek het R5,57. Kan ek asseblief na die honde kyk?"

Die eienaar maak die hok oop en al die hondjies hardloop na die seuntjie. Maar een van hulle hinkepink agterna. Dadelik wil die seuntjie weet: "Wat is verkeerd met daardie hondjie?"

Die eienaar verduidelik dat die veearts die hondjie ondersoek en gevind het dat die hondjie sonder 'n heuppotjie gebore is. Hy sal altyd mank wees.

Die klein seuntjie sê opgewonde: "Dit is die hondjie wat ek wil koop."

Die eienaar sê: "Nee, jy kan nie daardie hondjie koop nie. As jy hom wil hê, sal ek hom vir jou gee."

Maar die klein seuntjie antwoord ontsteld: "Ek wil hom nie verniet hê nie! Daardie klein hondjie is net soveel word as al die ander hondjies. Ek sal jou nou R5,57 gee en op die res elke maand R1,00 afbetaal - totdat ek alles betaal het."


Die eienaar sê toe heel driftig: "Jy kan nie hierdie hondjie koop nie! Hy sal nooit kan hardloop en spring en speel soos die ander hondjies nie."

Met dié rol die seuntjie sy linkerbroekspyp op.

Toe sien die eienaar dat sy linkerbeen kreupel is en in 'n groot metaalstut is. Die seuntjie sê saggies vir die eienaar: "Wel, ek hardloop self nie goed nie, en die klein hondjie sal iemand hê wat hom verstaan."

😊 Soms gaan ons deur moeilike tye sodat ons weer ander kan help wat deur dieselfde moeilike tye gaan. Ons verstaan dan beter hoe hulle voel.





Kalender April ~ Junie 2009

April 2009

Maandag	Dinsdag	Woensdag	Donderdag	Vrydag	Saterdag	Sondag
		1 Jak Wagenaar	2	3 Lizette Schulte	4 Meynhardt Marais	5 Marietjie Klaasen
6	7 Devan Marneweck	8 Presidente 9-13	9	10 Goeie Vrydag	11 Elsabé Grobler Richard Botha	12 Jaco vd Berg
13 Familiedag	14	15	16	17 Jane Kahts	18	19 Ruan Ueckermann
20	21 Lucille vd Berg	22 Johann Grobler	23	24 Marcelle vd Berg Fietvallei Feester 24 – 3 Mei	25	26
27 Vryheidsdag Fritz Crous	28	29 Larine vd Berg	30			

Mei 2009

Maandag	Dinsdag	Woensdag	Donderdag	Vrydag	Saterdag	Sondag
				1 Werkersdag Marie Roets	2	3
4 Jimmy Mckenzie	5	6	7	8 Charne Botha Anna v Rensburg	9	10
11	12	13	14	15	16	17
18 Anria Kahts Ben v Eden	19 Elize vd Berg	20 Gerrit v Rensburg	21 Waldo Crous	22 Klein Paradys (Brits) (Streek) Reinier vd Berg	23	24 Wayne Botha Chris Delport (Snr)
25	26	27 Nellie Stander	28 Ingrid Maas	29	30	31

Junie 2009						
Maandag	Dinsdag	Woensdag	Donderdag	Vrydag	Saterdag	Sondag
1 Chris Delport (jnr)	2	3	4	5	6	7
8 Rudie Crous	9	10 Carla Ueckermann	11 Linda v Vuuren	12 Koro-Koro 12-16 (Streek)	13	14
15 Annatjie Maritz	16 Jeugdag	17	18	19 Renscha Breytenbach	20	21 Arno Engelbrecht Tamara Kahts
22	23	24	25 Hennie Engelbrecht (jnr)	26	27	28
29	30					

Rietstok Nuusbrief

- 😊 Die Rietstok is ook beskikbaar op SAWA se webtuiste (www.sawa.org.za).
- 😊 Baie dankie aan almal wat bygedra het tot die nuusbrief. Rietvalleiers, sonder julle vrolike kampe en bydraes kan daar nie 'n nuusbrief wees nie.
- 😊 Stuur asb ALLE nuus asook fotos aan groblerje@absamail.co.za